



**VON GERINGEM
HERKOMMEN,
SCHÄNDLICHEM
LEBEN,
SCHMÄHLICHEM...**

Heinrich Knaust







Quercus 95 (14)

R

Von geringem herkom
men / schentlichem leben / schmeehlichem en-
de / des Türckischen Abgots Machomets /
vnd seiner verdamlischen vnd Gottzlesteri-
schen Ler / allen frommen Christen zu disen
geferlichen zeiten zur sterckung vnnnd trost
im glauben an Jesum Christum /
durch M. Henricum Enusti
num zusamen gebracht.

Anno 1 5 4 2.

Mense Maio.

Dem Durchleuchtigsten / Hochgebornne
Fürster vnd Herrn / Herrn Joachim / Marggraf=
fen zu B. indenburg / des heyligen Römischen Keychs
Erzkamerern vnd Churfürsten / zu Stetin / Pom=
mern / der Cassuben vnd Wenden / vñ in Schlesien
zu Crossen Herzogen / Burggraffen zu Nürm=
berg / vnd Fürsten zu Rugen / mei=
nem gnedigsten Herrn.



Durchleuchtigster / hochgeborner
Churfürst / gnedigster Herr / In was not
vñnd gefערligkeyt gemeine Christenheyt
yetz biß vber die ohren stecke / in disen letz=
ten / gefערlichen zeyten / mag vnd kan nicht gnugsam
gesagt oder außgesprochen werden / Sintemal es
nie so vbel von anfang der welt in der Kirche gestan=
den ist / als eben yetz zu der zeyt. Die sache darff mit
fast vil glose oder außlegung / Man sihet es für au=
gen / wie es so jemerlich vñnd ellend / ja auch schent=
lich mit allen stenden zustehet. Was soll man vil sa=
gen / Es leß sich nur alles an / als wolte es baldt zu
drümmern vnd zu grund in einen hauffen fallen / vnd
soll der alte topff zubrechen / vñnd ein newer darauß
werden / Es ist gar zu hoch gekommen / vñnd mag
schwerlich höher / also haben alle laster vberhandt
genommen.

Zu dem / so ist yetz / wie alle welt weyß / die hohe
anfech

anfechtung vom Türcken fürhanden/ welcher nicht
allein an vnsern grenzen raubet vnd brennet/ sonder
auch vnerhörter weyß/ mordet vnnnd vmbbringet/
jung vnd alt/ frawen vñ man/ schonet auch der kind
lein in muter leyb nicht/ spiesset auff die Zaunstecken/
schindet/ bret/ siedet/ hencket/ trencket/ nur wie es im
gefelt die heyligen Gottes/ vnd vergenß vnschuldig
blüt on maß vnd weyß. Vnd vber das alles / lester
er vnsern Gott vnd Herrn Jesum Christum mit vn-
erhörter lesterung / richtet seine Abgötter an vnsern
grenzen auff / vnd leß die jugendt vnser mitbrüder/
das Gott im hymel erbarmen müsse/ in seinem glau-
ben vnterweyßen / seinen stinckenden Gott Macho-
met zu ehren/ vnd werden also auß vnserm blüt/ vn-
ser verfolger vnd feinde.

Vnd wiewol dem also/ wie für augen/ kan es den
noch vnd will die blinde tolle welt nicht bedencken/
noch zu hertzen nemen. Vnd wenn man spricht oder
predigt / Es sey nie so vbel in der welt gestanden als
yert/ Got werde vñ müsse straffen/ vñ mit seinem ge-
richte komē/ So kan sie fein noch meisterlich antwor-
ten/ Es sey im alten Testament vnnnd vor zeyten wol
so selzam zugegangen als zu den yetzigen zeyten/ vnnnd
sey dennoch der jüngste tag nicht komē. Allein wir
haben frembde sorge / vnnnd fürchten das der hymel
falle. Wolan in Gottes namen / man wirdt es sehen
vnd erfaren.

Deßgleichen thun sie / weñ man vom Türcken
sagt / wie das er ein gewaltiger feind vnd ein harte
ruthe / vber vnsern rucken / von Gott geschickt sey/
vnd wie man Gott fleissig vnd emsig bitten soll / das
er solchen grausamen feind / vnd ein solche scharpffe
ruthe von vns wolte gnediglichen abwenden / So
kan die liebe Braut des Teuffels / die schöne Welt/
noch wol darzu ins feustlin lachē/ verachten das Ge
pet als vnnutz / vnd sprechen / ja man wils alles mit
beten außrichten . Ey wie wirdt der Türcke für vn
serm beten vnd glockenleuten zum Gepet lauffen / ha
ben also ir gespöt draus / weñ sie sampt irem gesindlin
soltē auff die knie fallen / vñ Got trewlich vñ von her
zen bitten / das er seinen Göttlichen namen vnd ehr/
ja nit wolte lang so gar schentlich schenden / leßtern /
vñ hōnen lassen von dem Türcken / vñ andern Gotß
leßtern / Sonder der sachen ein end machē / Nicht len
ger mit vns zürnen / dem Bluthund vñ Gotßflesterer
wehren / vnd vnser Nachbarn vnd lieben Buider
von solchem grossen elend vñ jamer / in welchem sie
yezt stecken / gnedig erlösen vnd erledigen .

Ober das / so kan das schöne muster die welt /
Gottes zorn vnd ernst gegen vns / darin er sich yezt
also leßt mercken / sein verkleinen / vñ sagen / Ey lieber
es ist so gar hefftig auch nit / wie es die Prediger ma
chen / die Türcken seind schlechte Kriegßleut / sie steen
nicht zc. Vnd sehen doch nicht wie vil Sieg vñnd
Triumph

Triumph inen Gott vmb vnser blindtheit / verstockung vnd sicherheit willen / gegeben hat / vñ villeicht / wo wir verharren würdē / noch mehr möchte gebē. Den das ist gewis / Gott straffet solchen mutwillen vnd sicherheit an vns / das wir seinen zorn nicht erkennen wöllen / vnd verkleinen den selbigen .

Aber die welt thut jm nicht anders / so sollen nun die kinder des liechts (nicht der welt) der ich dennoch hoffe sollen vil vnter vns sein / Gottes ernst vnd zorn erkennen / mit dem Gepet zu jm hinein rucken / fleissig anhalten vnd bitten / er wolte doch nicht vnser boßheit / sünde / vnd woluerdiente straff / Sonder mehr seine grundtlose barmherzigkeit ansehen / vnd seinen Göttlichen namen nicht also lassen vnter den heiden leßtern vnd schenden / Vnd wolte doch ein mal seine liebe Kirche / von der Tyranny / welcher sie manichfeltig vnterworffen / zu lezt erlösen vnd freyen / vñnd schir den alten kessel der welt / welcher nun vol löcher vñ nirgents mer zu tüchtig / in einander schlagen / vñ einen newen darauß gießen / Das sein name volkömmlich geehret vñ geheiligt werde / nicht mer / wie yetzt geschendet vnd geschmehet / Welches er zu seiner zeit / weiß er die ersehen vnd es jm gefällē / wol thun wirt / vnd der sach ein ende machen .

Mittler zeit aber sol weltliche Obrigkeit irem ampt nach / sambt dem Gepet / das Schwerdt in die faust nehmen / vnd es mit ernst angreifen / dem Teuffel vnd

seinem Reich/so vil Got gnad verleyhet/widerstand
thun/vnd jm nicht weiter einreumen / Den solches
sind sie iren vnterthanen zuthun schuldig vnd pflich-
tig. Vñ dieweil ein Fürst oder König allein solchem
gewaltigen feind stattlichen vnd gnugsamen wider-
stand nicht thun kan / So sind andere vmbliegende
Fürsten vnd Stende hilff zuthun/zum theil aus ge-
horsam/zum teil auch der nachbaurschafft halben/
schuldig / wie den nun (Gott sey lob) auff dem yetz
gehalten Keychstag zu Speyr löblich vnd Christ-
lich beschlossen ist/vnd Gott wirt seinen seggen darzu
geben / das es ob Gott will/wol sol hinaus gehn.

Vnd ich höre/ das E. C. G. sey vom Reich ein-
trechtig Oberster Feldthaubtman vber das Kriegsß
volck gewolet/des ich mich den höchlich/ wie billich/
frewe/vnd wünsche E. C. G. glück vnd heil zu sol-
chem hohen Ampt vñnd Ritterlichē ehren. Bit auch
Gott der Almechtige/welcher E. C. G. zu solchem
stand vnd Ampt auß versehen/wolte sein gnad vnd
seggen darzu geben / das E. C. G. möchte zu Gottes
ehren / Gemeiner Christenheit zu nutz/vnd zu E. C.
G. seelen seligkeit/ solches hohes ampt / wie ich hof-
fe / mit ehren hinaußfüren / Vnd wir wollen nichts
zweifeln / Gott werde es thun/alleyn laßt vns ihn
stets für augen haben / vnd nicht streyten oder kem-
pfen als aus vnser macht/ Sonder als aus macht
Gottes/der für vns streitet. Vñ laßt vns ja bey leibe
nicht

nicht auff vnsern wolgerüsten zeug böche/ Den wer
den wir das thun/so werden wir Gott erzürnen/vñ
ist die sache verloren. Sonder laßt vns ziehen als wi
der ein veldtvöl Teuffel/ da nicht wir/ sonder Gott
streiten müsse vnd vberwinden. Vnd werden wir
das thun/wirt vns der Sieg nicht entstehen.

Darumb nur frisch vñ frölich auff/was werbar
ist/vnd mit seinem lieben Landtsfürsten oder Obrig
keit fort gerucket/ vnd den hauffen angegriffen / wie
wol es eytel Teuffel sein/yedoch ist Got auff vnser sei
ten/8 streitet für vns/der Sieg kan vns nit entsteen.
Allein laßt vns frum sein/buß thun/vñ fleissig betē/
so hat es gar kein not/so wölle wir den Türcken wol
schlagen/doch nit wir/sonder Gott durch vns. Et
ist das kleine horn/da Daniel der Prophet von sagt/
welches vnter den zehen grossen hörnern erwachset/
vnd stößt drey der grossen abe / Welche drey vnter
den zehen Königreichen des Römischen Reichs/sind
Asia / Grecia / Aegyptus/welche Königreych drey/
die gewaltigsten im Römischē Keych der Türck yetzt
innen hat/Vnd hie hat er seinen theyl / er sol nit mer
vom Römischen Keych haben / Daniel gibt im nit
mehr. Was er aber yetzt in hungern / vnd andern
vnsern Königreychen ergrappelt / vnd also erschna
pet / wyrdt doch keynen bestandt haben / ist seyn
schlafftrunck / damit zu guter nacht. Laßt vns nur
die sache ernst sein/vnd mit Gottes forcht angreifen/
So

So wollen wir hungern / vnd andere Königreich
wol für im erhalten / Den er hat was er haben soll/
vnd Gott der allmechtig wirdt vns mit der zukunfft
seines Gerichtes beystandt thun / vnd vns helfen v-
berwinden / in mit hellischem fewr / bech vnd schwe-
fel verbrennen / vnd in den pful werffen . Den Daniel
da er im die drey hömer gegeben hat / gibt er im keins
mer / sonder spricht / Der alte werde drüber kommen /
vnd gericht sitzen . Das sey vns gnug zu trost vom
Daniel gesagt / vnd soll vns solches billich mutig ma-
chen / in Gottes namen frisch zu wagen / dieweil wir
hören sein Siegen sey aus / vnd er werde nichts mer
holen / Vnd Got wölle vns / seinen lieben heiligen xñ
Marterern / zu diser zeit beistand thun / xñ mit seinem
gericht vber solches scharmützel gnediglich vnd ge-
waltig erscheinen .

*Rug dieses
Büchlin.*

Dieweil aber villeicht in disem verzigigen gegenwer-
tigen zug / etliche etwan der vnsern möchten gefan-
gen / vnd in Türckey geführt werden / den selbigen hab
ich dis Büchlin zusamen gebracht / auff das sie sich
nicht villeicht durch den grossen schein des Türcki-
schen glaubens möchten verführen lassen / vnd vom
Christlichen glauben abweichen / Den hie sehen sie
den grund vnd bodem seiner betrieglichen ler / vnd
was doch sein geschmeis sey / wo her es einen vsp-
rüg hab ic. Den andern aber soll es dazu dienen / wenn sie
es lesen / das sie deyster freydiger werden die Türcken
anzugreiffen

anzugreifen/dieweil sie solche grosse vberschwenckliche Gotßflestung vnd Narren teyding hören/welche ja Gott nicht lenger dulden kan/sonder mus dar ein schlagen/vnd vns helfen/das wir also des Sieges deßer gewisser sein.

Vnd nach dem ich weis / das E. C. G. als ein frommer Gotßfürchtiger Fürst vnd herr/ dem gemeiner nutz vnd wolart der lieben Chustenheit zu herzen gehet/dem Türcken vnd seinem Machometische glauben/von hertzen vñ ernstlich aus einem Gottes eyfer feind ist/welches auch wol der herrliche vnd ritterliche Sieg/welchen E. C. G. vor etlichen jaren vom Türckē/durch sonderliche hilff Gottes gehabt/anzeiget. Hab ich diße meine zusammen getragene histortie vom Machomet/E. C. G. zuschreiben wöllen/in hoffnūg/als solte solchs mein fürnemen vñ werck E. C. G. wolgefellig/in gnaden angenommen werdē. Vnangesehen / das es wol an jm selbs ein geringes werck/vnd nit wert ist/das vnter E. C. G. herrlichem vñ hochgedachtem namē außgeen sol. Vnd doch so kan E. C. G. hieran meinen wolgeneigten willen vnd gemüt gegen E. C. G. spüren vnd mercken.

Bit derhalben E. C. G. wolten in dis mein fürnemen vnd geringes Büchlin wolgefallen vnd annehmen sein lassen/hieran meinen fleiß vnd wolgeneigte willen gegen E. C. G. erkennen/vnd mich sampt meinen studijs in E. C. G. befohlen sein lassen/ Daran
b ich

ich keinen zweifel trag/dieweil ich sehe/das E. C. G.
Gots wort vnd die kunste wert vnd lieb hat/auch ge-
lerte leut/deren ich doch der geringst bin/in schutz vñ
schirm handthabet. Des den E. C. G. Landschafft
zu seiner zeit/hauffig vnd vberflüssig geniessen wirt/
Vnd wirt Gott der allmechtig auch solches an E.
C. G. person/hie zeitlich/vnd dort ewig nicht vnbe-
lonet lassen. Der E. C. G. zu seinen ehren vnd Ge-
meyner Christenheit zu nutz/disen gegenwertigē zug-
nediglich in gesund vnd glück volenden helffe / das
Gottes ehr verfochten / die lere Christlichs glau-
bens bey den nachkomen erhalten/vnd dem schent-
lichen Gotlosen Bluthunde dem Türcken zu letzt ein
mal gewehret vñ gesteuert möge werden / Das er ja
zum wenigsten nicht so gar yemerlich vnser lieben
Nachbarn vnd mitbrüder zerhacke / erwürge vnd
vñbringe. Des vns helffe der herr Jesus vnser trost
vnd stercke/auff welchen wir vns verlassen/ bochen
vnd tragen wider den Türcken vnd alle Teuffel/ Der
wirt vns nicht verlassen/so wir im vertrauen / vnd
durch in zu streiten fürnemen. Amen.

E. C. G.

Vnterheniger vnd
geflüßner

M. heinrich Cnustius
von hamburg.

Von dem herkommen Machometis / soull sein
geschlecht vnd den ort da er geboren/
belanget. Das erst Capitel.

Die Schrifft sagt Gene. am xvj. wie das Agar
die magd Abrahe sey stolz wordē / als sie sahe dz
sie schwanger gieng / also dz sie die fraw mußte auß-
stossen / vñ wie sie darnach wiß zu ir kam / vñ den son
Ismael gebar / dauon der Engel verkündigt / wie er
ein wilder mensch würde sein vñ streitbar / vñ sich se-
tzen wider alle seine brüder. Daher mans noch dafür
helt / dz der Türcke von disem Ismael herkomē / & ge-
wonet hat in Arabia / Daher sie auch vrsprung habē /
das man Hagarenos heisset die Sarracener / Vnd
rechnen sie Ismaels nachkommen vnd geschlecht also.

Ismael hat geborn Cedar / welcher gebar Hamel.
Hamel gebar Tehich. Tehich gebar Hameffa / Hames-
sa Adech / Adech Abue / Abue Adne / Adne Mahack
einen grossen Abgöttischen menschen / welcher seinem
son Usar geopffert hat / wie man sehen mag im buch
der geburt Mahuritz. Diser Usar ist der ander engel
des Teuffels nach Ismael gewesen / vnd hat geborn
Muzar / welcher gebar Alien. Alien aber gebar E-
mosera / Emosera Melich / Melich Vain / Vain Lu-
ije / Luije Galiben / Galiben Caph / Caph Mirra /
Mirra Coidai / Coidai Abdemenoph eine schentliche
Abgöttischen Gottflescher / auff welchen die kunst
b ij Ismae

Ismaelis vnd seines vorfarn Usaris geerbt war/
wie man weiter lesen mag im obgenanten Buch der
geburt Mahuriz. Diser Abdemenoph gebar Abde-
mutaliph/von welchem kam Abdala / welcher den
Teuffelstöpff Nachomet mit Emma seinem weibe
zeuget/die inen gebar in einem offen flecklin/welchs
heißt Ytrarip/vñ ligt nicht weit von Nequa in Ara-
bia. Man sagt sein vatter sey ein Edelman aus Ara-
bia gewesen/aber sein Mutter ein Jüdin.

Diser ist der dritte Engel des Teuffels gewesen/
zu verschemen dz menschlich geschlecht / von seynem
meyster dem Teuffel gesandt / welcher Gottes ehre
vnd aller menschen seligkeit von hertzen vnd von na-
tur feind ist/kan vnd mag nit leiden/das die reine leer
des Euangelij von Jesu Christo im schwang bleibe.
Nus Secten vnd Schwermergeister erregen / die
etwas neues vñ selzames herfür bringen/Deñ new
ding gefelt der welt wol / darumb er deñ auch disen
Nachomet sampt seinem schentlichem vnd Gotsfle-
sterlichem Gesetz auffgeworffen hat/das er ja etwas
selzames vñ neues brechte/vil damit zuuerfürende/
Wie er sich noch heutigs tags mit ein wenig auch vn-
ter vns Christē mercken leßt/vñ etlich jar daher sich
hefftig ser hat mercken lassen/wie aller welt wol be-
kandt ist. Wolan/er thut jm nit anders/es ist sein art
dauon er nicht lassen kan / er hette lengest noch einen
Nachomet auffgeworffen vñ erregt/wo es jm Got
het

het wollen/vmb vnser sünd willen / zugeben / Aber
Gott ist trew vñ from/der mer sein grundtlose barm
herzigkeit/den vnser trefliche grosse sünde/ vnd teg-
lich vngheorsam/schuld vñ vntrew ansihet. Er leset
vns nur also ein wenig züchtigen/vnd durch ansech-
tung der falschen leer probiren/auff dz er wissen mi-
ge/was er für volck habe/was sie bey jm thun wol-
len/ob sie fest oder nit fest / ob sie stehn oder abfallen
wollen. Wen kein falsche ler were/so könnte man auch
die rechten Christen nicht erkennen / Aber in der zeyt
der not/vnd wen die falschen Propheten daher ge-
schlichen kumen/vnd ir vnkraut beginnen zu seen/ so
sihet man welche die rechten frommen vnd bestendi-
gen Christen seyen/Wie man yetz leider zu Ofen vnd
in andern Stetten / so der Türcke innen hat/wol se-
hen vnd mercken wirdt/welche die rechten bestendi-
gen Christen gewesen sein / Den die guten leute sind
recht mitten vnter den Wolffen vnd falschen Prophe-
ten. Haben sie nun etwas von Christo/von welchem
sie den namen ja habē wollen/gelernet oder behaltē/
wirt inen nutz werden. Doch ist zu hoffen/das noch
vil tausent frommer bestendiger hertzlicher Christen
vnter inen sein/welche sich lieber erseuffen/köpffen/
hencken/vnd nur alle marter anthun lassen werden/
ehe sie vom Christlichen glauben vnd irem Seligma-
cher abfallen wolten/des inen vnd vns Got helffe.

b iij Von

Von dem ersten anfang seiner Secten. Das ander Capitel.

Eie ist vnter andern zu wissen / das der obgenante Vatter Machometi Abdalla / hab grosse kuntschaft vñ freundschaft mit einem Jüde / welcher ein Astronimus gewesen / gehabt. Diser Jude war nicht allein im Jüdischen Gesetz wol erfahren / sonder wußte auch den Glauben vnd das Gesetz der Christen meysterlich. Es begab sich aber das eben des jars / da Enima den jungen Teuffel Machomet empfangen hatte / ein seer truckner Sommer war durch ganz Arabia / das man weder pflügen noch seen kund / vnd musten grosses hungers halben gras vñ wurzeln des feldes essen. Da aber die zeyt kam / das Enima iren son Machomet den jungen Teuffel gebor / sahe der obgenante Jude / weil er ein Astronimus war / die gestalt vñnd constitution des hymels vnd der Sternen an / vber die geburt des kindes / vñ sagte zuuor / das kindt würde gewaltig werden im Reich vñ Gesetz. Vnd da solchs geschach / war Abdalla nicht einheimisch / Denn er war vber sellt gen Jerusalem gezogen / alda nach gewonheit der zeyt / zu beten. Da er aber zu hauß kam / ward im vom Juden angezeygt / das das kindlein im new geborn / solt groß vnd gewaltig werden im Reich vñnd Gesetz / welches er auß dem Gestirn der geburt stunde erkun

erkundet vnd gemercket hette. Vnd nach wenig tagen hernach/ stirbt Abdalla in dem selbigen flecklein Ararip.

Zu der selbigen zeyt da Machomet geboren ward/ sassen die Arabier vnd die inn Africa / in grossen bedencken / Denn sie wusten nicht / zu welchem glauben sie sich halten solten / Ob sie solten dem glauben vnd leer der Christen/ Juden/ oder Arrianer folgen. Vnd da Machomet vier jar alt war / erdachte der obgenante Jude ein schedliche / schendliche/ vnuer- schampte lügen / sagte er hette im gesicht gesehen zwen Engel / welche hetten Machomet das hertz auß dem leyb genommen / das selbige mitten von ein- ander geteylet/ vnd einen klumpffen blüts darauff ge- zogen/ vnd darnach sein mit reynem/ klaren/ schönen wasser außgewaschen/ vnd da solchs geschehen/ auf eine wagschale gelegt / vñ gegen zehen andern hertzen des selben volcks gewogen / darnach aber mit tau- sent andern hertzen/ Darumb das sie funden Mach- omets hertz inierzu schwerer/ denn die andern. Also das der ein Engel zum andern solt gesagt haben/ Wo das hertz wurde gegen alle hertzen inn Arabia auff die wagschale gelegt werden / wurde es sie alle in der schwere vbertreffen. Solches sprach der Ju- de/ hat mir Gabriel im gesicht offenbart.

Da nun Machomet acht jar alt war/ starb im sein Mutter vnd Großvater Abdemutaleph / Vnd
nam

nam in auff zu Vornündern Abutalip seines Vatern bruder. Der selbig gab in zu vnterweyßen dem obgenanten Juden/ welcher in vnterweyset inn den natürlichen künsten/ vñ sonderlich im Gesetz der Juden vnd Chriſten. hie hat er vil geleret / des er darnach schentlich zu seiner Secten / vilen Seelen zum verdammniß/ mußbraucht hat.

Man schreibt auch das/ da er. xxiiij. jar alt gewesen /sey gen Egypten gezogen seinem handel nach/ zukaußschlagen/ Vnd hab sich daselbs zum Chriſten vnd Juden/ so sich etwan da enthalten/ geschlagen/ mit inen kuntschafft gemacht / vñ vil zuthun mit inen gehabt/sey auch ein zeytlang da bey inen geblieben vnd conuersirt. Sonderlich aber hab er grosse freundschaft vñ vil wesens gehabt mit einem Mönch von Antiochia/ mit namen Ioannes / da er seer wol mit gestanden/ Von dem selbigen hat er vil hinderlistige stück/ betriegerey vnd verfälschung der schrifft gelernet/ beyde des Alten vnd Newen Testaments / Damit er sich möcht gegen den Juden vnd Chriſten schützen. Denn diser Mönch/ war ein verketter vñ Gotteslesterlicher Ketzer/ der mit solchen fäulen sachen mechtig wol wußte vmbzugehen/ wie die vnsern auch.

Man schreybt weyter/ Das auch Nachomet sey eines andern Mönchs/ mit namen Sergij/ welcher ein Aegyptischer Ketzer/ discipulus oder Schuler gewesen

wesen. Diser Sergius da er auch in den irthumb Nestorij getriedt/ist er von den andern Mönchen/seinen brüdern/vertrieben/vñ in Arabiam komen/daselbst dem Nachomet beystandt gethon/vñ im anhengig gewesen. hat im auch weiter vom Alten vñ Newen Testament/welches er felschlich/vñ nach seinem willen auflegte/bericht gethon/wie sie schreiben/Vnd haben also samptlich auß der Jüden vnd Christen ler einen kuchen gebachen/vnd ein sonderlich Gesetz daraus gemacht. Daher man nun wol spüren vnd mercken kan/den vrsprung vnd das herkommen der Gotsflesterlichen vnd schentlichen Secten des Nachomets. Wo kompt sie her? Eben aus der Schül der Jüden vñ Mönche/vñ ihres Meisters des Teuffels. Danck habt nun mein lieben Mönche/schmückt euch nun/vnd laßt euch heilig geduncken/hie sihet man wol/was jr für gesellē seydt/vnd was von ewer heiligkeit kommen sey.

Von der zeit des anfangs diser

Secten. Das dritt Capitel.

Es hat sich dise schentliche verfluchte Secte fast am ende des Keiserthumbs Eraclij/im 630. jar wie man schreibt/nach Christi geburt/erhaben/da er sein vermaledeyte Gesetz gegeben hat/welches er aus der Chyften vnd Jüden Gesetz zusammen geschlagen.

c

vnd

vnd geflicket hatte/durch hilffe des Möñchs vnd anderer/welche vnter dem Teuffel vnd Gotte mittels wolten/wie vnser klugen Papisten heut auch fürnehmen. Vnd mit solchem schein hat er die Arabier gar an sich gezogen/welche in/wie folget / zu einem König auffwurffen.

Von dem vnreinen vnd vnzüchtigem leben
ben Nachometi. Das vierdt Capitel.

Erstlich hat diser bößwicht ein vnrein/vnehrlich/vnzüchtig leben für der welt geführt/in allerley hurerey vnd ehebruch/also das ers auch nit verhelet od heimlich gehalten/sonder solches öffentlich getrieben hat/vnd wol zu friden ist gewesen/das es yederman hat gewist. Er sprach aber wie in seinem Alchoran Alzoara xlii.steht/das Gott mit im dispensirt hette & hurerey vnd ehebruchs halben/vnd im gar allein solches zu vben zugelassen. Den wie alle Sarracenen wol wissen/hette er kuntschafft mit einem weibe/des name was Maria Jacobina/welche im zu wegē gebracht war durch Nachoqueum den König der Jacobiner. Da aber dise zwo andere seiner weiber / alenemlich Anosse/ein tochter Hebebor/die edelste vnter jnen/vnd Ahassa ein tochter Homor/mercketen/wurden sie vnwillig / vnd verdroß sie ser. Es begab sich aber ein mal/das dise zwey seine weiber on alle gefehr zu im

zu im in sein gemach küssen / vnd finden in mit dem
andern weibe Maria Jacobina ic. vnd sagen zu im:
Ja sol ein Prophet also thun vnd lebene zu welchen
worten er erschrocken ist / vnd rot worden / hat da ge-
schworen / er wolte es nicht mer thun. Auff welches
schweren sich die weiber zu friden geben. Nicht lang
darnach kompt er wider zu dem selbigen weibe / kan
sich irer nicht messigen / vnd macht da ein Gesetz da-
von / als aus Gottes mund / der im solches hette ge-
offenbaret / wie in seinem Alchoran zu sehen ist.

Hat sonst vil vnzucht / dauon hie nicht zusagen/
getrieben. Wollust des fleisches ist sein höchsten gut
gewesen. Er schreibt in seinem Alchoran / Alzora
xlv. das sein Paradis sey nach aller wollust zugerich-
tet / hab darin hübsche frawen vñ Concubinas / vnd
die aller schönsten Junckfrawen / Silbern vñ guldin
geschir / vnd die aller beste vnd köstlichste schnabel
weide. Darumb er in dem Buch von seiner ler / wel-
ches bey den Türcken vnter den fürnembsten Büch-
ern eins ist / sagt er / dz im Paradis sol das erst gericht
sein / die leber eines weissen visches / ein ser köstlich es-
sen. Darnach die fruchte der beume ic. Wil also schlies-
sen / es were alles im Paradis vergeblich vnd nichts
werdt / wo nicht Junge frawen vnd Junckfrawen /
fressen vñ sauffen dz beste volauff dabey were. Das
ist mir ein gesel / ymmer mit im zum Teuffel zu.

Er gibt auch in seinem Alchoran im Capitel de

Baca nach/die greulichē sünden/von welcher wege
Sodoma vnd Gomorra ist mit hellischem feur ver-
brandt worden/Darüb mit wunder were / weñ Got
bech/schwefel/vnd hellisch feur vber den Türcken
regnete/wie vber die von Gomorra vnd Sodoma.
Aber das ers so lange hat geschehen lassen vnd zuge-
sehē/ist vnser sünde schuld/Er wirts aber yetzt schier
nit lenger können dulden / sonderlich wo wir busse
thun werden. Deñ der Türcke ist ja nichts anders
deñ vnser ruthe/damit vns Gott der allmechtige va-
ter/ als vngheorsame kinder züchtiget vnd steupet.
Wo wir aber from werden/wirdt er/wie ein vater/
weñ sich der son bessert / die ruthe ins feur werffen/
vñ sie verbrennen/welche er nun nicht mer darff/ die
weil der son von seinem bösen leben abgelassen hat.

Von der hochfart vnd vermessenheit des Machomets. Das fünffte Capitel.

Weter ist diser Gotslesterer eins hohen vermes-
sen geistes/ wie alle Ketzer/ vnd ir meyster der
Teuffel selbs/gewesen/ Ist also aus vnmesziger begir
zu regiren / gleich durch grad der böshheit / ymer hö-
her vnd höher geistigen/wie der Lucifer / auff das er
der Jsmaeliten König wurde.

Deñ in seyner jugendt/da er ein Kauffman war/
vnnnd offft reysset mit seynen Cammelen gen Egy-
pten

pten vñ Palestina / gieng alda vil mit den Chrusten vñ
Juden vmb / lernet er nicht allein sein das alte vñnd
niewe Testament / sonder ward auch ein volkomener
schwartzkünstiger.

Vnd da er ein mal in die Prouintz Cana zog / wel-
cher Prouintz domina oder Fürstin heysset Tagida /
verwundert sich die selbige Fürstin vber so manch-
erley vñ seltsame species vñ wahr des Machomets /
Began sie derhalben in lieb zugewinnen / vñnd mach-
te kantschafft mit im / Vñnd schlug sich Machomet
zu jr / gab jr vil guter wort / das er mit fuge an sie ke-
me / sie zu verführen. Vñ dieweyl er die sach hoch mu-
gen kund / vñnd prechtig dation reden / war auch ge-
schickt inn beyderley Gesetz / Wunderte sich die Für-
stinne vber seine köstliche rede / vñnd verschlagene
wort noch vil mehr / vñnd hielt vil von im. Welches
da er merckte / Sprach er zu der Fürstinnen : Liebe
fraw / ich will euch nichts verhalten / sonder die war-
heyt sagen / Ich byn Messias von Got gefand / wel-
chen die Juden noch heutiges tages erwarten. Vnd
dieweyl er ein Schwartzkünstiger war vñ mit dem
Teuffel vmbgieng / bewerte er solches mit Teuffli-
schen wunderzeychen vñnd vil zaubereyen. Betrog
also mit seinen falschen wunderzeychen / welche er
durch den finger vñnd auß macht des Teuffels thet-
te / vñnd mit seinen hinderlistigen wortten / nicht allein
die gutte Fürstin / sonder auch vil der Juden vñnd

Sarracenen. Denn da die Jüden vnd Sarracenen solch new vnd vnerhört ding vom Nachomet erfurten/erschracken sie/ meinten der Messias wer da für handen / sonderlich die weyl sie wunderzeychen sahen. Zogen im derhalben nach mit grossen hauffen/ vnd gaben sich zu im. Da began er in ein new Gesetz zumachen/ welches er auß dem alten vnd neuen Testament bewerte/ auff das sein giff vngemercket bliebe/ Gebrauchte hierin hilff vnd rath des Gottlosen verfluchten Münchs Sergij/ welcher ein Arrianer Ketzer/ wie obgesagt war / Vnd die Ismaeliten oder Sarracenen nennen diß Gesetz noch heuttigtages jr Gesetz/ vnd bekennen Nachomet sey jr Legislator gewesen.

Dise obgenante Fürstinne auch/ da sie sahe/ das also die Jüden vnd Sarracenen vil von Nachomet hielten / ihm heuffig volgeten vnd anhiengen/ auch vil ehr vnd reuerenz erzeigten/ meinte sie gewiß vnd ließ jr geduncken / es wer etwan ein Göttliche Maiestet bey im verborgen. Vnd dieweyl sie eine Wittfraw war/ nam sie in zur Ehe/ Also das Nachomet ein oberster vñ Fürst des selbigen ganzen Land ward/ vberkam grosse reichthumb vnd war gewaltig nach seines stoltzen/ frechen hertzens begir.

Zoch darnach inn Hispaniam am letzten jar des Königes Richardi/ vnd kam in die Stat Corduben vnd predigte alda seine vermaledeyte/ verfluchte ler/

Nem

Nemlich/ das der Herr Ihesus Christus vnser lieber
seligmacher/ sey wol geboren auß der reinen Junck-
frawen Maria / durch hilff des heyligen Geystes /
Sey aber nicht warer Got gewesen. Solches kam
für den Ertzbischof in Hispanien Isidorum / der schi-
ckete sein volck auß zu der selbigen Stat Corduben /
da Nachomet also predigte / vnnnd gab ein befelch /
man solte iuen gefangen nemen vñ jm zu füren. Aber
der Teuffel erschiene Nachomet vnnnd ermanete in /
das er sich von dannen begeben. Also bald flohe er /
gab sich in ein Schiff / vnd für vber in Africam / da
er vil / ja vnzellige menge der menschen betrogen hat
wie auch in Arabia.

Dise alle jm anhengig / fielen den Persen in jr Kö-
nigreich / verwißteteten das selbige / vnd zogen mit ge-
walt / das Keyserthumb Orientis anzusechten. Vñ
hat dise lose Roth vnd verloren hauffe also gewaltig
mit der zeyt zugenommen / das der Keyser Traclius
inen nicht hat können gnugsamen widerstand thun.
Denn sie hetten nun schon Syriam eingenommen vnd
ein groß teyl Palestine / Welches ist gewesen / wie et-
liche wöllen / des Reichs Traclij im. xx. jar.

Er hat auch vnter andern / damit er ein grosse men-
nige des volcks jm bald anhengig machte / vnnnd zu
jm brechte / dise hinderlist gebrauchet. Denn da er sa-
he / dzer von allen umbligende Lendern vñ völkern
für einen hohen Gottes Propheten gehalten ward /
began

began er hohe ding inn seinem hertzen zugedencken/
als nemlich/wie er sich möchte gegen dem Römische
König empören vnd in vertreyben/ Mächte dertal
ben dem Römischen Keyser sein volck widerspenning
vnd vngheorsam / damit das er ihnen anzeyget vnnnd
hoch auffsmutzet/wie sie von den Römern mit dienst
geplaget/geschindet/geschatzt vnd geschabet wür-
den on maß vnd weysß. Vnd das sie eben yetzt wol
möchten/ wenn sie selber wolten/von solchem schwe-
ren dienst vnd schinderey / durch in vnd viler Landt
hilff vnd beystandt erlediget vnd gefreyet werden/
wo sie doch erst Chrißlichen glauben gar verlaugne-
ten/vnnnd seiner ler anhengig weren / Denn on das/
sprach er / möchten sie nicht siegen. Vnd mit solchen
worten macht er das volck abtrinnig vñ aufftürlich
das sie den Römern ab vñ im zu fielen / Zu welchem
den auch seer halff das ansehen/das er sich für einen
grossen Propheten außgab / der gemeinschafft mit
Gott hette/vnd der durch Gottes finger vil wunder
zeichen thette. Es waren auch vil der Juden von ihm
betrogen / welche nicht anders weneneten/ er were ie-
Messias.

Vnd da nun Eradius die seinen in Africam schick-
te/das die Einwoner ihren gewöhnlichen tribut vnd
schatzung geben / zoge ihnen Mächomet mit denen/
welche er erreder vnd widerspenning gemacht/entge-
gen/vnd sprach / sie gedechten dem Römischen Key-
ser

ser keinen Tribut zugeben. Darnach schlug er sich mit
inen darumb/ vñ behielt den Sieg. Da ward er erst
stolz vñ mutig/ zog in Arabiam/ Syria vñ Mesopo
tamiam/ welche länd er im vnterthenig gemacht hat
te/ vñ erregete auch die andern vmbbligēde Stete/ dz
sie sich/ wie die andern/ aus der Römer hand gewalt
vnd dienst zubrechen gedechten/ wie auch geschach.

Dasselbig mal treumete dem Keiser Eradio/ wie
das kleine meuse in Africa jung würden/ welche zer
gnageten den saum seines kleids. Vnd darnach da er
erfur/ das Machomet mit seinem anhang hette im sei
ne gesanten in Africa erschlagen/ vnd das sie im nicht
wolten in gehorsam gebüeliche Zins vnd Tribut ge
ben/ brachte er ein groß volck zusammen/ vñ schickte sei
nen bruder Theodorum/ der in Orient saß/ wider die
widerstennigen in Africa/ sie zuschlagen/ vnd wider
vnter den gehorsam zubringen. Zog also Theodorus
hin in Africam/ that ein schlacht mit inen/ vnd verlor
sie durch Gotes schickung/ flohe vñ kam selbs kaum
dauß. Erzelete darnach alles dem Keiser/ wie es sich
begeben hatte/ vnd bat / man wolte ihm ein grösser
Kriegßvolck zugeben/ das er zum andern mal wider
die halßstarrigen/ vngehorsamen buben ziehen möch
te. Da sagte im der Keiser seinen traum von den meu
sen in Africa/ welcher im getraumet hatte/ nicht deß
weniger brachte er einen vil grössern hauffen Kriegß
volck zusammen/ weder der vorige gewesen war / vnd

ließ seinen bruder Theodorus damit zum andern mal
fort rucken/wider die vngehorsamen. Aber wiewol
des Kriegßvolcks der Römer set vil war, yedoch da
sie in der feind Land kamen/vnd sahen des Macho-
mets starcken gewalt vnd freudigkeit / entfiel inen ds
hertz/vnd zweyffelten in zuschlagen/zogen derhal-
ben wider zu ruck nach einer Vesten/heißt Gabatin.
Da das Machomet merckte/war er hinder inen her/
vnd erschlug irer ein grosse mennige. Die Römer a-
ber da sie sahen/das er hinder inen her war/vnd irer
vil schentlich in der flucht starben / wendten sie sich/
vnd hielten ein schlacht mit im/wurden doch entlich
die Römer vberwunden / vñ ward des Keisers bru-
der Theodorus erschlagen/vnd kamen wenig dauß.
Also ward der Römer Gebiet vnd Regiment in Afri-
ca auffgehoben/vnd nigergelegt.

Als nun die Agareni/das ist / die Sarracenen/
vnd ir anhang sahen/das sie die Römer vberwundē
hetten/vnd den Sieg behalten/wurden sie vber die
maß hoch erstrewet / vnd zogen wider in Syriam/
vnd kamen in die Statt Damasci/ da ward Macho-
met/aus des ganzen hauffens bewilligung vnd be-
felch / zum König gewelet vnd gekrönet/Den der ge-
meyne hauff hing im an/ vnd hetten in lieb/Darum
das er sie also aus der Römer dienst vnd hand gestrey-
et vnd gelöset hatte/vnd regierte zehen jar. Dis ist ge-
zogen ex generali historia hispanie.

Wie

Wie das Machomet on allen zweiffel aus-
sonderlicher schickung vñ straff Gottes/mit der bö-
sen krankheit/welchs man die fallende seucht/ auff
Latinisch Morbum comitialem nennet/ befa-
len gewesen sey. Das sechst Capitel.

Der das alles mit einander / sagen auch die hi-
storien/das diser Machomet sey on allen zweyf-
fel durch sonderliche straff Gottes/ mit der stürzen-
den seucht oder fallenden Siechtagen/ Gott behüt
vns/befallen vñ geplagt gewesen. Vñ wiewol dem
also / hat ers doch nicht wort haben wollen / Vnd
weñ jne die krankheit angekömē / hat ers also /
wie in der folgenden historien gemelt wirt/ verblä-
met / zugedeckt / vnnd geberget. Den eins mals da
in die krankheit gewaltig anstieß/vnd beweltiget/al-
so dz er plözlich zur erden fiel/vñ im dz maul/ gleich
einem schweine/ in gegenwertigkeit seiner Königin/
scheumet/betrübte sich die frome Königin hertzlich
ser/weinete vnd war vnmütig / das sie solchen Un-
flat / der mit solcher schweren vnd erschrecklichen
krankheit befallen / zum mann gekriegt hette. Aber
da er sahe / das sie also betrübet vnd vnmuts voll
war/erhub er sich/wolte sie zu fridē stellē/vñ sprach:
Liebes weib/erschrick nicht/ich hab yetz ein gesprech
gehalten mit Gabriel dem Erzengel / vnd kan seines
angesichtes klarheit nicht sehen/Den darumb fall ich
d ij zur

zur erde / vnnnd zergeth alle meine krafft vnd macht /
weñ ich sein wunderbarlich angesicht anschawe. Vñ
da er das gesagt / that er in irer gegenwertigkeit etli-
che schwarzkünftige wunderzeychen durch hilff vñ
beistand des Teuffels / der sich in einē Engel des liech-
tes zuuervandlen pflegt. Glaubte im derhalben sei-
ne Königin vnd andere völder / den sie meynten Ga-
briel der Erzengel redet also offte mit im / Vnd dz er
aus desselben befehl vnd mund sein Gesetz machete /
vnd zuhalten gebiete.

Was aber sein Gesetz gewesen / woher es komen
sey / vnd ander ding mer dabey / wölle wir nachmals
anzeigen. Wollen yetzt sein leben / welches wir kurtz-
lich / so vil dauon zu wissen gnug / verfasset / mit sei-
nem tod beschliessen. Den ein yeder / aus dem was
vor gesagt / wol abnemen vnd mercken mag / was er
für ein gesell gewesen / das nur eytel Teuffels gespenst
vnd werck mit im sey. Man kōndte wol mer haben
von disem allen geschrieben / aber ich achte es wer für
vnnötig / darumb ichs hie will bleiben vnd gut sein
lassen / vñ sagen wie er vmbkomen sey vnd gestorbe.

Vom schmehtlichen tod vnd end Ma- chometi. Das sibendte Capitel.

SA nun diser Bößwicht in aller vnzucht / vnd
bösen tücken / seyn leben fast biß auff vier vnd
dreißig

dreissig jar gebracht hatte / im zehenden jar seines
Reichs / geschach es / das seiner jünger einer / mit na-
men Albunor / versuchen wolt / ob seines meysters
kunst vnd leer auch gewisz wer / Vnd ob er würde
am dritten tage wider aufferstehen vnd gen hymel
faren / Denn er hatte von im gehört oftmals / wie
das er / wenn er zehen jar regiert hette / sterben wür-
de / vnd am dritten tage erstehen vñ gen hymel faren.
Derhalben diser schalck heymlich giffit zurichtet / vnd
gibts dem Nachomet zutrincken.

Da kompt schalck vber schalck / vnd strafft Got /
wie man pflegt zusagen / den einen schalck durch den
andern. Als er aber dise giffit getruncken hette / wän-
delt sich also bald sein farbe / stößt im die giffit das her-
ze abe / wie er verdienet hette. Sein leyb aber ward
fleyssig von den andern jüngern bewart / welche mei-
neten er würde am dritten tage wider erstehen / wie
er gesagt hette. Aber da sie sahen / das er tod war vñ
tod blieb / vnd nicht wider erstünd am dritten tage /
wie sie glaubten / Vnd der leyb nun begand zu stin-
cken / lieffen sie in vnbegrabē ligen / vñ zogen dauon.
Am Wylfften tage nach seinem tod / kam auch der jün-
ger Albunor / der im vergeben hette / wider / vñ wolt
doch sehen wie er lege / Vnd wie Lucas Tudensis in
seiner Cronick schreybet / hat diser seinen leyb gefun-
den von den hunden gefressen / vnd hat die knochen
zusamen gelesen vñ sie begrabē in einer Stat / welch

612
d iij auf

auff Arabisch heyst Meduiataziel. Diß ist des Böß
wichts / des scheysfenden Gottes anfang / leben vnd
end gewesen. Vil der Arabier vnd der andern / die di
se betriegerey mercketen / fielen von jm abe / vnd wol
ten seinem glauben nicht mehr anhengig sein / dieweil
er nicht erstanden wer von dem tode / wie er gesagt
hette. Wie aber diße betriegliche vnd erlogne leer ei
nen fortgang gehabt habe / vnd doch gleichwol bey
den nachkommen bliben sey / wöllen wir am ende dises
Buchs mit kurtzen worten sagen / Jetzt aber wöllen
wir von seiner leer vnnnd seinem vermaledeyten Ge
setz / des der Teuffel ein meyster gewesen / ein wenig
setzen / doch mit der kurtze.

In was weyse er sein gesetz gegeben
hat. Das acht Capitel.

Er sagte / wie oben etlicher maß angezeigt ist / das
er ein Prophet von Gott gesandt wer / zur selig
keyt der völkter / das Gesetz der Jüden vnd Chriſten
zu mitteln vnd zumessigen / dieweyl es zu hart were.
Vnd damit das volck ja gewiß glaubte / er were
von Got gesand / vnd sein Gesetz keme auch von Got
her / bescheydete er dz volck auff einen gewissen platz /
da solten sie sehen durch wunderzeichen / das sein Ge
setz von Gott keme. Vnd da er nun auff dem selbigen
platz / da er das volck hyn bescheyden / vil plauderte
vnd

vnd predigte von seinem Gesetz / Kompt eine Taube
geflogen/welche er dazu gewenet hette lange zuvor/
die setzet sich auff seine schulder/vñ bicket jm ins ohr/
Denn er hette rockenkömichen ins ohr gestrewet/vñ
hette sie gewenet / das sie jm auß dem ohr/ wenn sie
hungrig war/essen muste. Da meinte das ellendt
volck/das wer der heylig Geyst/der jm in der gestalt
der Tauben das Gesetz einbliesse. Vnd sahen die gu-
ten leute nicht / das die Taube jm auß dem ohr asse.
Aber Gott hat es nicht wöllen haben / das es solte
gemerckt werden / hat dem Teuffel ein zeytlang bey
dem volck raum wöllen geben,

Des gleichen kam auch ein Ochse zu jm für dem
volck/dem er sein Gesetz an die Hörner gebunden het-
te. Diser war gewenet jm auß der hand zuessen/wen
er seine stymie höret. Also meinet hie auch das volck/
der Ochse wer von Got sonderlich zu jm geschickt/
das er jm das Gesetz brechte. Wein grosse blindheyt
vnd verstockung des armen volckes/ Ist doch solch
ding schier nicht zu glauben. Ja hie sihest du was
wir von vns selbs sein / vñ was wir vermögen
wenn Gott die hand abzeucht/wie wir dahyn fallen
vnd strauchelen/Also das der da stehet/wol zusehen
mag/das ist/wol Gott bitten mag/ das er nicht fal-
le/wie Paulus ermanet/Denn mit vnserm thun vnd
kressen ist es nichts/ wen vns Got die augē zubind/
so

so können wir auch die aller gröbesten lügen nicht erkennen vnd mercken/sonder müssen die für war vnd gerecht halten vnnnd anbeten / Wie wir Christen im Bapstum so vil jar daher sein auch mit grosser blindheyt vnnnd verstockung von Gott geplagt gewesen/ das mich offte feer/ ja auch on allen zweyffel die ganze welt yetzt wundert / das so vil verstendiger vnd gelärter leut die grosse betriegererey vnd vngegründte leer des Bapstumbs nicht erkandt noch gemerckt haben/ Ja es gehet nicht anders zu/ wen vns Got das hütlein vber die augen thut vnd spricht / Ir solt mit sehenden augen blind sein. Vñ diß ist ein sonderliche straff Gottes.

Die ganze schrifft ist solcher historien vol/ Sihe an was zu Münster bey vnsern tagen geschehen ist: Lise ander Geschicht/der die welt vol ist. Darumb darff man sich vber solche blindheyt nicht verwundern. Es ist Gott gar keine kunst / einen sehenden zu verblenden/ Widerumb auch einen blinden sehen zu machen/ Solches macht er nach seinem gefallen.

Ich will noch ein stück vom Nachomet sagen/ Er hette auch etliche fesser vol hönig vñ milch/ heimlich vnter die Erde vergraben / die selbigen ließ er auch herfür bringen/zeyget sie dem volck/ als zum zeichen der künfftigen vberflüssigkeyt / welche durch solch sein Gesetz solt erlanget / vñ zu wegen gebracht werden. Hat also das blinde volck durch solch betriegererey

geret/ vnd falsche wunderzeichen verfür/ vnd seyn
Gesetz anzunemen/ sie mutig vnd gehertzet gemacht.

Vom irthumb vnd falscheit des Gese- zes Machometi. Das neundt Capitel.

Der Teuffel hat alle alte Ketzereyen / welcher er
zuuor in der welt fast hin vnd wider mit höch-
stem fleiß durch seine glider geseet / durch disen Ma-
chomet sein aussérwehltes faß/ernewert.

Den erstlich verleugnet er die Dreyfaltigkeit der
personen in der Gottheit / mit dem Sabellio.

Zum andern leret er/ Christus sey gewesen ein lau-
ter Creatur/ mit dem Arrio/ welches er vom münch
Sergio/ der ein Arrianer war/ gelernet hatte.

Zum dritten sagte er/ die Juden hetten nicht Chri-
stum getödtet/ sonder einen im gleich. Hierin kompt er
vber ein mit dem Manicheo.

Zum vierdten leret er/ Got hab Christum zu sich
gehn hymel genomen / aber er werde schir am ende
der welt wider erscheinen / vnd den Antichrist töd-
ten/ vnd darnach wirdt in Got sterben lassen. Vnd
diu weil er Christi todts verleugnet / verwirfft er auch
die Sacrament/ welche durch Christus tod vñ auff
erstehung befestiget vnd bestetiget sind.

Zum fünfften sagt er/ das auch die Teuffel könne
durch seinen Alchoran selig werden/ vnd das vil der
e Teuffe

Teuffel/da sie den Alchoran haben lesen hören / sind
Sarracenen worden.

Zum sechsten sagt er / das da Gott hab Gabriel
zu im geschickt/sey er zu Gott getretten. Da hab im
Gott die handt auff die achffel gelegt/die sey so kalt ge
wesen,als ein eys/das er auch hab die kelte der hand/
im marck der beine vñ im ruckē gefület. hierin stimp
er vberlein mit den Kezern / welche sagen/Gott hab
hend vnd füsse wie wir.

Zum sibenden spricht er auch vñ leret/ der heilig
Geist sey ein Creatur. hierin/ ist mir recht/ trifft er v
berein mit Machedonio.

Zum achten sagt er/dz etliche Engel sind zu Teuf
feln worden/darumb das sie Adam nicht haben wol
len anbeten. Vnd hierin stimp er mit niemandt.

Zum neunnden setzet er des menschen seligkeyt ste
he in freessen vnd sauffen / in vnzucht treiben/in schö
nen kleydern/in schönen lustbarlichen gärten. O du
grobe Saw.

Zum zehenden setz er im Capitel de Mensa / das
es mit seinem volck gar verloren sey / wo sie nicht sein
Gesetz/vnd das Buch im geoffenbaret / als nemlich
den Alchoran/halten ic.

Zum eylfften hat er geleret/ man möge on allen
vnterscheyd wol anderer lewt weyber nemen vnd
entwenden.

Zum

Zum zwelfften leret er auch / man möge ser wol
nur vil weiber / ein yeder nach seinem gefallen / habē.

Zum dreyzehenden leret er / man solt sich oft wa
schen mit wasser / zu vergebung der sünde / Das ist sein
Taufse / kompt schir vber ein mit den Widerteuffern.

Zum vierdzehenden / gibt er zu die Sodomiti
schen vnd stumien sünde / spricht das sey kein sünde /
wie in seinem Alchoran offenbar stehet.

Dis ist die ganze sum̃ seiner Gottflesterschen vñ
verfluchten ler / kurtz gefasset. Vnd wer diser ler ent
gegen war / oder seinem Gesetz nicht glauben wolt /
s mußst / durch befehl Nachomets / des tods sterbē.

Von der narrheit vnd fabeln des Ge setz Nachomets. Das zehent Capitel.

Auch wöllen wir hie etliche nerrische / lepische /
lügenhaffrige stücke / vñ faule zoten vom Gesetz
Nachometi anzeigē / daraus ein yeder / der seine fünff
sinne recht hat / wol mercken wirt / dz nit Gottes Ge
setz / sonð des Teuffels sey / Den der heilig Geist geht
ja mit solchen schalen / lecherlichen / nerrischen zotten
nicht vmb / wie du hie sihest / wöllen sie derhalben se
tzen / das du etwas zu lächen habest / doch nicht alle /
sonder etliche fürneme / lecherliche stücke.

Im Capitel de Lenemelle / welches heist verdol
metscht ein Ameyss / Fornica / sagt er / das Salomon
c ij hab

hab ein mal versamlet einen grossen hauffen Engel/
nemlich der menschen vnd thier/ vnd da sie hin wart-
derten vnd zogen/ funden sie ein gross wasser vol A-
meyß/ Vnter welchen hat ein Ameyß gesagt: Wir lie-
ben Ameyß vertriecht euch in ewer löcher/ das euch
Salomon vnd seine Reuter nicht erhaschen vnd töd-
ten/ sagt solches mit lachen. Nach wenig tagen da al-
le Vögel vom Salomon verschriben waren/ dz sie
zusamen in ein heer kemen/ blieb der Wydhop aussen.
Da sagt Salomon / Was ist das / das ich hie den
Wydhop nicht sihe. Ey ich will jm den kopff abreyß-
sen lassen/ oder er sol anzeigen/ aus was vrsach er aus-
sen blieben sey. Bald darnach kam der Wydhop/
stieg auff vnd sprach: Eia ich hab gelernet das ir nit
wisset/ vnd bin zu euch komen aus Saba mit war-
haftigem geschrey. Den ich habe ein weib vnter jnen
sehen regiren/ vñ hab gefunden/ dz ir volck die Son-
ne anbetet on Gott.

Item im Capitel Delchamar/ welches ist verdol-
metscht/ in der zeit des Mons kam des Mons stunde
vñ der Mon zerbrach. Das deutẽ ire lerer also/ Das
Nachomet sey ein mal gestanden/ sampt seiner gesell-
schafft/ vñ haben den Mon gesehen/ dz er sich zu der
Cõunction geneiget vñ genahet. Da habẽ seine gesel-
len/ welche bey jm gestandẽ/ vñ solchs gesehen/ zu jm
gesagt: Zeige vns ein wunderzeichẽ. Da hat Nacho-
met dẽ Mon mit zweien fingern gewincket/ Also bald
ist der

ist der Mon von einander inn zwey stücke gefallen/
Ein stück auff den berg Elitais / der auff der einen
seyten der Stat Mequa ligt. Das ander stück oder
teyl auff den andern berg / welcher auff der andern
seyten der Stat ligt. Vnd als der Mon also zerbro-
chen vnd zerfallen war / sey er im in den Rocksermel
getrochen/da hab er in wider gang gemacht.

Auch gibt Nachomet in libro Narrationum vr-
sach/warumb man nicht wein drincken sol/vñ sagt/
Got habe zwen Engel auff Erden geschickt/welche
wol regieren vnd recht richten solten/vnd sind die sel-
bigen Engel gewesen Aroth vñ Maroth. Vñ es ist
ein mal on alles gefer ein Weyblein gekömen / wechs
eine sach gehabt / hat sie zu gast gebeten/vñ hat inen
wein zutrincken geben/welchen inen Got zu trincken
verbotten hette. Vnd da sie nun vol sind worden/ha-
ben sie dem selbigen Weyblein ic. angemuttet / das
Weyblein hat ja gesagt/vnd darein gewilliget/doch
mit dem bescheyde/das einer sie solte hynauff gen hy-
mel/der ander wider herunter steygen leren. Vnd da
sie nun solches gelernet vñ in den hymel hinein stieg/
sah sie vnser Herr Gott/vnnd fragte wie sie hynein
kömen wer/vnnd da er die sache höret / machet er sie
zum Morgenstern/das sie die schönest vnter den ster-
nen wer/ gleich wie sie die schönest vnter den Wey-
bern gewesen wer. Den zweyen Engeln aber/wel-
che sich veründiget hetten / gab er die wale / Ob sie
e iij lieber

lieber wolten hie oder in der künfftigen welt gestraffet werden. Da erweleten sie / ire straff hie lieber zu empfangen denn inn jener welt. Also bald hieng sie Got bey den füßen an einer eisen ketten vber den Babilonischen pful. Das ist mir ja / maine ich / ein feiner außserwelter / schaler / grober / stinckender poß.

Solcher schalen bossen sind vil / welche mich verdrust zu setzen / Doch will ich noch eins oder zwey setzen / Er spricht im obgenanten Buch / der hymel sey auß der feuchtigkeyt der Erden / welche feuchtigkeyt pflegt auß der Erde / wie ein rauch zugehen / geschaffen. Die feuchtigkeyt aber der Erden sey auß der feuchtigkeyt des Meers komen / Vnd das Meer von einem Berg / welcher heist Caph / der gehet vmb die ganze welt her / vnd helt den hymel.

Noch eins muß ich sagen / Denn das ist ein lechterlicher poß / Diuweyl wir ja inn die fabeln vnd possen geradten sind / Er spricht / die Sarp sey geboren vnd jung worden auß des Elephanten direct / Vnnd die Maus auß dem Sewmüß / Die Kanze auß dem fürhaubt des Löwen / das erzelet er auff die weyse.

Als Noe mit seinen kindern vnd andern thieren / in der Arch war / neygete sich die Arche weñ die thiere ire natur zu lassen giengen / vnnd sonderlich wenn der Elephant gieng. Vnnd da sie sich seer fürchteten des wassers halben / wenn sich die Arche also neygete / fragte Noe Gott vmb rath / welcher sagt im / Gehe

hin & inclina culum eius ad foramen stercorarij (sit honos aurib.) vñ Noe that es. Als nun der Elephant sein ding gethan hette/ vñ einen mist gemacht/ ward eine grosse Saw drauß. Als aber die Saw mit der schnauze iren eygen mist vmbwurff/ wie sie pflegt/ ward ein Maus drauß/ welche zernaget die Arche vnd machte löcher drein. Da wolte es nicht gut werden/ fragte derhalben abermal Noe Gott vmb rath/ wie er im thun solt. Da sprach Gott/ schlag den Löwen für den kopff/ so wirdt ein Katze herauß springen. Er thet es. Also bald sprang eine Katz herfür auß seinen naslöchern/ die erwürgete darnach die Meuse. Vnd diß sagt er/ ist die vrsach/ warumb Schweinen fleysch zu essen verboten sey.

Auch sagt er im Buch seiner Narration/ das Got am ende der welt/ werde alle creatur tödten/ auch die Engel vnd Erzengel/ Vñ wirt nichts das leben behalten/ allein Gott vnd der Tod/ welcher ist auch ein Engel mit namen Adriel/ Als denn wirdt Gott auch Adrieli/ dem tod gebieten/ das er sich selbs tödte/ wenn das geschehen/ wirdt Gott mit lauter stym schreyen vnd sagen/ Wo sind die Obersten vnd Fürsten der welt/ Vnd darnach wirt er alles erwecken.

Aber hie wollen wirs bey den schalen poffen erwindē lassen vñ bleyben/ Sind man doch der gleichē wol im Vdenspiegel/ Marcolphus vñ paffen vō Calenberg vñ andn mehr/ Was ich hie aber gesetzt hab
ist

ist dem Türcken vnd seinem Machometischen glauben zu schmach geschehen / das wir sehen / Gott hab in verblend vñ verstocket / dz er solchen offentlichen lügen anhangen muß / vñnd sie so grausam / wie er thut / durch so vil blüt vergiessen / schützen vnd hand haben. Das wir vns an seinem Exempel bessern mögen / vnd Gottes wort nicht verachten / auff das wir auch nicht also in offentliche lügen dahin fallen / wie dise. Denn wo man Gottes wort verachtet / nit lieb vnd werd hat / da gehet es also zu. Wer Gott nicht hören will / Ey der muß den Teuffel hören / da wird nichts anders auß / wie Paulus sagt / Gleich wie sie nicht geachtet haben / das sie Gott erkendten (vñ wie er zuvor gesagt / Gott ehreten / Gott dancketen &c.) hat sie auch Got hyngegeben in einen verkerten sün / zuthun das sich nicht zymet / vol alles vnrechten / hurererey / schalckheyt / geyrigkeyt / boßheyt / vol hasses / mords / zanccks / list / giffrigkeyt / ohrenblasens / affterredens / Gottes verachtung / hoffart / sinantz &c. Wie wir im Türcken vnd seinem Abgott sehen.

Von dem stinckenden fundament vnd grund des Gesetzes Machometi.

Das Eyllfte Capitel.

In Buch / welches auff Arabisch / heyst hal-maherig / auff latin / In altum ascendere / in die höhe

höhe steigen / darumb es den auch gemeinglich die
leyter Machometi genennet wirt / setzt er lxxv. capi
tel / in welchen er ein gedicht seines auffsteigens vñ ni
dersteigens gründet / damit er seinem Gesez ein Fun
dament hat legen wollen / lautet derhalben also.

Da ich Machomet war zu Mequa in meinem
hauß / vñ lag in meinem beth bey meinem weyb / vñ
nun lang vom Gesez Gottes meditiert vñ hoch gesin
net vnd gedacht hatte / began ich einzuschlumiern / vñ
also bald kompt zu mir Gabriel der Engel vnter diser
gestalt / Sein angesicht war weisser den milch oder
schnee / Sein har röter den ein schöne Koral / Het sei
ne grosse herrliche augbraen / einen schönē roten wol
gestalten mund / seine weisse scheinbarliche zen. hatte
auch weisse kleider an / auffß aller herrlichst mit Ber
lin vnd edlen Gesteinen gewyrckt vñ gestycket / War
gegürtet mit zweyen gürteln von köstlichem lauterm
goldt / vnd ein yedes war grösser vnd breiter den ein
grosse handtbreit. Seine hend waren rot gleich wie
ferw / seine flügel vnd füß grüner den ein Smaragd
sein mag. Vñ er sagte zu mir / Machomet höre / Ste
he auff / folge mir nach / güрте dich mit deinem gärtel /
vnd thue deine weisse zwehle vmb den kopff vñ vññ
den leib / den Gott will dir vil seiner gewalt vnd sei
ner heymlichkeyt / vnd wunderwerck sehen lassen di
se nacht. Als ich derhalben auffstund / vnd kam zur
thür meines hauses / sahe ich das Gabriel beim zaun

hielt ein thier / welches er mir zu selten gebracht hat:
te / das heist Alborac / vnd hatte die gestalt / Es war
grösser den ein Esel / vnd kleiner den ein Maul / es het
te ein angesicht eines menschen / vnd sein har waren
von Berlen / seine brüst von einem Smaragdo / sein
Schwanz von einem Rubin / Sein augen waren
heller den die Sönnen / hette süß gleich einem Kamel:
Dis thier war gesattelt mit einem sattel so gar köstlich
zugericht mit Berlen vñ edlen Gesteinen / das es kein
mensch gnugsam außreden kan. Sagt hernach in
obgenantem Buch vil mer von der schönheit vñnd
zier dñes Thiers / welches ist gewesen der leydige
Teuffel. Darnach volget. Vnd dis thier war
gantz vñ gar vmbgeben mit Engeln (ja mit schwar
tzen Engeln / die in des Teuffels kuchen das sewr au
zündten vnd zustackten / Solche Engel sinds gewe
sen. Vnd diser sein Gabriel / da er hie von sagt / ist on
allē zweyffel ein sonderlicher Teuffel gewesen. Vol
get. Da sagte Gabriel zu mir: Nachomet schreyt
hinauff auff das thier / vnd reyht. Vnd da ich zum
thier mich nahet / das ich hinauff sesse / wolte mich dz
thier nicht lassen. Da sprach der Engel zum thier: Al
borac stehe stille / den ich sage dir mit einem Eyde /
das noch nie kein solcher mensch auff dir gefessen ist /
wirt auch diweyl die Welt stehet / nicht sitzen. (Dis
ist war / wen man das (solcher) recht verstehet / wie
mans verstein sol / von der schalckheyt vnd Gotloß
heyt

heit / Den̄ sa der Teuffel in seiner Kyrchen auff seyner
Cathedra / nie keinen schedlichern / verfluchtern / bö
fern / verkertern / Gottflessterlichern / Gottloßern Ke
rzer / Dieb / Verrheter vnn̄d Mölder / von anfang
der Welt gehabt / denn eben disen / der alle andere
Kerzereyen / wie die heysen / übt / treybt / schüzet /
vnn̄d wyder hereiner gefürt hat / Wyrdt seyns gley
chen auch die Welt nicht haben.) Volget. Da
fraget das Thier vnd sprach : Wer ist den̄ der ? Ga
briel / ja des Teuffels muter / antwort : Dis ist Ma
chomet / Gottes sendbot vñ grosser Prophet. Als dz
dis Thier horte / stund es also bald stil / vnd ich ritte.
Gabriel aber hielt mir die leytet / das ich fein hinauff
steygen kondt. Da rytt ich dahin / vnn̄d ich hatte ach
tung auff des Pferdes schryt. Da sahe ich / das ein
schritt so weyt vom andern war / als ein mensch auff
fernest außsehen kan. Vnd das Thier gieng gleych
hin nach dem Tempel zu hierusalem / vnd der En
gel gieng mit mir. Da vnter wegen horte ich ein stim
me / die rufft zwyr : ha / ha / Machomet harre mey
ner. Vnd ich antwortet nichts. Darnach sahe ich ein
vber auß schon weib / die rufft mir drey mal : ha Ma
chomet / harre ein wenig / las dich anreden. Vñ da sie
zu mir kam / vnd wolt mit mir reden / ward ich vn
willig / vnd ließ sie stehn. Da sagt Gabriel / nun sihe
ich das du klug bist / den̄ die erst stym̄e was dz Gesez
der Juden / vnd hettest du da geantwortet / so weren

alle deine völder Juden worden. Die ander stymme war das Gesetz der Chyften / vnd hettestu da auch geantwortet / so weren alle deine völder Chyften worden. Aber das weib das dir zu letzt geruffen hat / mit den bundten kleidern / ist dise Welt / welche aller wollust voll ist / Vnd dieweil du die erharret hast / So wisse das dein volck sol mer wollust vnd freud auff diser erden haben / den ye ein volck gehabt hat / oder haben wirt ic.

Mittler zeit kamen wir für den Tempel / da heisset er mich her vnter steigen / vnd er band Alborac an / vñ furte mich bey der hand in den Tempel / Da fand ich alle Propheten stehn in einem kreiß / die Gott hette lassen aus iren grebern komen / mich zu ehren. Vnd da thete ich zwo herrliche Oraciones oder rede. Vnd sie grüßeten mich alle / vnd waren frölich vber mich / vñ sagten mir vil guter newer zeitung / was mir Got bereitet hette ic. Vnd im andern Buch / sue doctrine / sagt er / das er da Abraham / Moisen / vnd Jesum / den Son Marie / gefunden hab / vnd sagt / Moses hab im ein faß vol wein geopffert / Abraham ein faß vol milch / vnd Jesus ein faß vol wasser (O du ver-zweiffelter Bößwicht vñ lügner.) Darnach sagt er / er hab ein stymme von hymel gehört / die hab gesagt / Wirstu das faß vol weins erwehlen / solt du vñ dein volck umbkominen. Wirstu das faß milch erwehlen / soltu auch umbkominen. Wirstu aber das faß wasser erwehlen

erwehlen / solt du vnd dein volck ewig selig sein. Vnd
da Nachomet dis fundament predigte / sagte er dazu
(damit er sein lügen sterckete) Moses war rot / vñ het
te krause har / Jesus hette gele har / vnd wer mittel-
messiger lenge / Abraham wer im gar enlich.

Nun volget im obgenanten Buch noch vil mer
vnnutzeding von der leyter Nachometi / welche im
Tempel gestanden / vnd von der erde bis gen himel
gereycht hat . Vnd wie er da vil Engel in dem auff-
steigen angeredt hab / Erstlich den Engel des tods /
dauon zuuor gesagt. Darnach vil lügen mer / welche
inich verdreufft zusetzen / dieweil wir nicht im sine ha-
ben hie Türcken zumachen / alleyn des Türckischen
Gesetzes falscheit / vñ seiner Teufflischen ler vngrund
vnd erlogenheit / anzuzeigen. Was aber nun sein Ler
vnd Religion sey / vnd was es für einen grund habe /
kan ein yeder gnugsam spüren vnd wissen / aus den
obgesagten stücken / in welchen man klar sihet / Das
es narrerey / eytel Teufflich wesen / vnd ein verblen-
dung ist / mit dem Türcken vnd seinem leben / wie o-
ben mit mer Worten gesagt.

Aber der Teuffel ist ein tausentkünstiger / wiewol
des Türcken ler / so faul stinckent ding ist / vnd lügen /
dz man sie mit feusten greiffen mag . So kan er doch
solche vniuerschampte lügen / so meisterlich schmu-
cken / das es wunder ist. Den ich höre / das der Türck
in der Türckey / vnd wo er sein wesen hat / also dise

seyne lügen vnd erlogene lere / mit Ceremonien vnd
eussertlichem gepreng vnnnd leben / also schmucket
vnd zyeret / das vnser Papisten Ceremonien / wel-
che doch auch einen grossen schein gehabt / nichts
dabey zuachten sind . Vnd durch solchen schein ver-
führt er die einfeltigen / sonst wurde sein lügen bald ge-
merckt werden / wie das weyter zu lesen ist in vnser
lieben vaters vnd herrn Doctoris Martini Lutheri
Beerpredig.

Darvmb ist not / das der einfeltige etwas von der
verlogen / stinckenden ler des Machometz wisse / das
er sich solchen schein / welcher die einfeltigē pflegt zu
verführen / mit irren lasse / sonder die selbige ler hasse / ir
vō herze feind vñ gefeß sey. Den disen spruch müssen
wir fest halten / vnd bey dem bleiben / den Paulus
sagt: Wir predigen euch Jesum Christum den gecreu-
zigten / den Juden zwar ein ergernus / den Heiden a-
ber ein thorheit ꝛc. Vnd wenn ein Engel vom himel
keme / vnd predigte euch ein ander Euangelium / den
wir euch vom Herrn Jesu Christo dem gecreuzig-
ten gepredigt haben / so laßt es verflucht sein / sit Ana-
thema. Den außser disem Christo müssen wir nichts
annemen / noch glauben / es habe so grossen schein ala
es ymmer wölle / Den diser Christus alleyn ist vns
von Gott fürgersezt zu einer versönnung vnnnd selig-
keit / allen denen die an in glauben. So las nū Macho-
met Machomet sein / laß Teufel Teufel sein / laß schein
schein

schein sein. Diser Christus der gecreuzigte ist mein seligkeyt / vnd außserhalb im ist kein seligkeyt. An den will ich mich halten / Ich weysß das mir hie die seligkeyt nicht entstehen kan / Denn von disem geben alle Propheten zeugnis. Vnd der heylig Geyst spricht / Es ist kein ander nam weder im hymel noch auff erden / durch welchen man selig werden kan / allein durch den namen Jesus Christus. Das laßt vns genug sein / vnnnd laßt vns keinen seligmacher mehr suchen. Diser ist allein der eynig mitler vnter Gott vnd den menschen. Das Lamb Gottes / welches weg nimpt die sünde der welt / Gottes des Almechtigen lieber eyniger Son / inn welchem er ein wolgefallen hat / den laßt vns hören / vnd keinen andern.

Nun solte ich wol auch etwas sagen / wie zuvor verheissen / wie das Machomets Gesetz nach seinem schentlichen tod vnd abgang gebliben sey / vnd einen fortgang gehabt habe. Aber was soll ich vil sagen / der Teuffel ist ein tausentkünstler / ein schalck vber alle schelcke / dem ein büberey oder schalckheyt im schwang zu erhalten kein kunst ist / sonderlich wenn es im Gott zu leß vnnnd raum dazu gibt. Er hat solcher stücke wol mehr gebraucht / Er kan sein auß weyssem schwarz machen / auß ja nein / Das einer nicht anders meint / sonder im sey also. Das ist sein meysterstück / das gebraucht er offft vnnnd vil mal inn

der welt/wie des alle historien vol sind. Darumb
will ichs hie beleyben lassen / vnnnd nichts mehr von
dem stinckenden ass Nachomet sagen/ Sonder wöl
len Gott fleysfig bitten/ Er wolte die Herren vñ Für
sten erleuchtē/ das sie vber der reynen leer des Euang
gelij vom gecreuzigten vnserm Herrn Jesu Christo/
den der Türck begert zu tilgen vñ außzurotten/haltē
möchten/vnd die schützen vnd handhaben/vnd vn
ser brüder in hungern vnnnd anderswo / welche der
Türcke gedencet seinen stinckenden / lügenhafftigen
Nachomet anzubeten zu zwingen / durch Gottes
hilff freyen vnd ledigen / vnd wolte die in Grecia vñ
andern Stetten/welche der Türcke inne hat/da vor
zeyten vil guter fromer Christen gewonet/ beim rech
ten glauben an den Herrn Ihesum erhalten / oder sie
bekeret/Vnd vns seine gnade geben vnd verleyhen/
das wir nicht vnter einander heyden vnd Türcken/
oder erger denn heyden vnd Türcken werden. Des
helffe vns der herr Jesus Christus/ vnser lieber hey
land vnd seligmacher/ der gecreuzigte. Zu ehr vnnnd
preiß seinem Göttlichen namen vñ Maiestet/Amen.

Ein

Ein Prophecey Danie-

lis am. 7. von den vier Monarchien
vnd dem Türckischen Reich.

Ich Daniel sahe ein gesicht in der nacht / Vñ sihe die vier winde vnter dem hymel stürmeten wider einander auf dem grossen Meer / vnd vier grosse thier stiegen herauß auß dem Meer / eins ye anders / den das ander. Das erste wie ein Löwe / vnd hette flügel wie ein Adeler. Das ander thier hernach war gleich einem Beren / vñ stund auff der einen seiten / vnd hette in seinem maul vnter seinen Zenen / drey grosse lange Zene. Das dritte war gleich einem Parden / das hette vier flügel / wie ein vogel auff seinem rücken / vnd das selbig hette vier kopffe. Das vierde thier war greulich vnd schrecklich vnd seer starck / vñ hette grosse eysener Zene / stieß vmb sich vnd zumalmet / vnd das vbrig zutrats mit seinen füßen. Es war auch vil anders denn die vorigen / vñ hette zehen hörner. Da ich aber die hörner schawet / sihe da brach herfür zwischen den selbigen ein ander klein horn / für welches der fordersten hörner drey außgerissen wurden. Vñ sihe das selbig horn hette augen / wie

wie menschen augen/ vnd sein maul das redet grosse
ding. Solches sahe ich biß das die Stüle gesetzt
wurden. Vnd der Alte setzet sich/ das Gericht ward
gehalten/ vnd die Bücher wurden auffgethan. Ich
sahe zu vmb der grossen rede willen / so das horn re-
det. Ich sahe zu biß das thier getödtet ward/ vnnnd
sein leyb vmbkam/ vnd ins Feuer geworffen ward/
vnd der andern thier gewalt auch auß war.

